



Ai 18 di Dicembar li dal Visionario di Udin, serade di premiazion per la diesime edizion Concors par tescj cinematografics in marilenghe. >> DI **CHRISTIAN ROMANINI**

Cine furlàn sot dai rifletòrs

Rivâts insom dal an, Udin si prepare a chê che aromai e je une tradizion no dome pal mont dal cine, ma in efietis par dut il mont de culture furlane: la serade di premiazion inmanade dal Centri Espressions Cinematografichis, che si fasarà ai 18 di Dicembar li dal Visionario di Udin. Jessint che l'an passât e jere la Mostre dal Cine, chest an i tocje al Concors par tescj cinematografics. O fin sintût **Fabian Ros**, anime de manifestazion, par rivâ a savê cualchi anticipazion spietant i nons dai vincidòrs.

Ce edizion ise chê di chest an?

“O sin rivâts ae diesime edizion. Calcolant che il concurs al è bienâl, la prime edizion si è davelte tal 1996. In chê volte il concurs al jere dome pes senegjaturis. Vuê al previôt cuatri sezions: senegjaturis, storiis par film, saçs sul cine e articui di critiche”.

Trope int aie partecipât?

“Chest àn i lavòrs presentâts a son stâts cutuardis. Cualchidun al jere fat a cuatri mans.”

Ce puedistu dînus su la cualitât des voris presentadis?

“In medie e je alte e in cressite. Calcolant che si trate di oparis specialisticis sul plan de tecniche di scritture, il risultât al è une vore interessant pe lenghe furlane”.

Ce vèso programât pe serade di premiazion?

“Dongje de presentazion de riviste ‘Segnâi di lûs’, si previôt la proiezion di siet curmetraçs sedi dal passât che vignûts fûr di resint. In chest ultin câs o viodarìn un episodi de seconde stagjon di ‘Felici ma Furlans’ e une pontade di ‘SkletXstremTV’ di Giorgio Cantoni sui sports estrens. Pes oparis mancûl resintis o mostarìn ‘Cuatri cjantons par une francje’, il prin lavôr vincidôr dal Concors diventât film”.

E il prossim an al sarâ chel de Mostre bienâl dal Cine: puedistu dânus cualchi anticipazion?

“O sin in contat cun diviersis realtâts a nivel european, cun autòrs, cun produtòrs e ançe cun altris festivals. Par esempli la Mostre e je fate in partenariât cul ‘Babel Film Festival’ di Cagliari/Casteddu e a tacâ di chest an ançe cu la ‘Mòstra de Cinéma Occitan’. Si trate di un lavôr seguitif ma al è ancjemò masse adore par dâ cualchi anticipazion. La intenzion e sarès chê di slargjâ plui che si pues la presince al festival dai protagoniscj europeans”.

Ce salût aial il cine par furlan?

“Sul plan de cualitât la salût e je une vore buine, o vin autòrs che a àn ben in man il mieç audiovisif. L'avignî al dipent dut des condizions che sul plan politic e vegnin ufiertis ae lenghe furlane”.



ilfriuli@ilfriuli.it

IL ZÛC

Imparâ a fevelâ cul mont

Un zûc didatic in plui lenghis cun cjartis ilustradis di doprà, di lei e di cjantâ, realizât di **Silvana Schiavi Fachin** pe cooperative Futura cu la poie de ARLeF. Si clame ‘99Peraulis. Fevelâ cul mont - Parlare col mondo - Talking to the world’ la publicazion ad ûs didatic pes scuelis e pes fameis cun 99 cjartis scritis par furlan e in altris

14 lenghis: lenghis di cjase e lenghis di scuele, lenghis autoctonis e lenghis de gnove imigrazion. I dissens, inmagants, a nassin invezit dai lavòrs dai fantats dal Centri Diurni fats vivi ad implen de fantasie di **Patrizia Geremia**.



Sabide ai 13 di Dicembar aes 11.30 tal Centri Diurni Punto Zero de Coop. Futura a San Vit, vie de presentazion i fruts de scuele elementâr a fasaran, adun cu la autore, une simulazion di zûc par meti ae prove lis lôr abilitâts ludichis e linguisticis.

SCOLTADIS DI DRIUS

Come Masterchef

Le me femine e à fat un còrs di cusine. A ore di gustâ mi domande simpri ce scjatolète che à di viargi.



Euronews informa

“SnaitBag”, la Provincie e done altris doi strissons par sostignî il progjet dal Ateneu furlan

Daspò de prime donazion di trê strissons in pvc te Vierte passade, la Provincie di Udin e invistis inmò tal progjet de Universitât di Udin cognossût come “Snaitbag”, che al previôt il ricicli dai strissons stradai e publicitaris par creâ borsis (“bag” par inglês) di impat dinamic e svelto (“snait” e je la peraula furlane che e volte l’inglês “smart”). Lis assessoris a lis Politichis Socialis Elisa Battaglia e ae Culture Francesca Musto a àn volût donâ ae Universitât altris doi strissons in pvc, dopràts pe promozion di dôs mostris di artiscj locai, organizadis de Provincie tai mès passâts. Il materiâl plastic al vignarà trasformât in borsis e altris acessoris che a laran a insiorâ i prodots comerciâi dal Ateneu; la trasformazion originâl e je dade ae cooperative sociâl “Rio Terà dei pensieri” di Vignese che si ocupe



di fâ lavorâ personis che a son in esecuzion penâl. Cussì “e ven dade une seconde pussibilitât a materiài che se no a saressin lâts in discjarie - e ricuarde la assessore Battaglia. - Cun di plui si contribuîs a dâ une oportunitât di lavôr a cui che si cjate in dificoltàt te vite. O ringracii la Universitât par vè ideât chest progjet”. “Cun chesta donazion - e va indevant la assessore Musto - o fasin onôr ae lenghe e ae culture furlane, o tignin in pîts une idee imprenditoriâl, o sostignin une cooperative sociâl e o mostin di vè a cûr l’ambient. E, no par ultin, o sostignin la ufierte formative de Universitât dal Friûl”. Lis “SnaitBag”, disponibilis in diviersis tipologjiiis, si puedin cjatâ li dal Snaït Shop de Universitât di Udin, palaç Antonini in vie Petracco 4, e-mail snaitshop@uniud.it.